

Kurō Fesiya Od

Od Uyu Irouya

¹ Jesus Kristus nē kurō fesiya od, are ereb kaisā bagai wō youf anī, Negurem yogon ferfer ifelnēdiyof nigin Jesus ifenen. Jesus ī, yogon ferfer Jon od anī keleī youf nigin, yogon engel Jon bun sur fen. ² Jonem ereb ereb ganān ī ilen anī kurō falaisif, are Negur nē od ado, Jesus Kristus nē od. ³ Taka ī profet od enei iwesef are ī el fiyek, agef fen, idi anī karī de fen, ereb anī bun itoton anī waud bun dinof anidi el fedif, ere nigin, sain mogo dodolef.

Jon Sios Sewen Bun Yogon Aanya Sur Fen

⁴ Aya Jon,

Asia provins bun sios sewen bun pas enei atotof.

Negur ī gama ibodok, kulu ibodon, dumen isiyof bunem, uur sewen yogon king nē sia wagen difaref bunem ado, ⁵ Jesus Kristus ī Negur nē od el fe dōf wogō yedig, ī tamo gare den bun tamal uyulil kel turī fiyen, tenebur king ganān neid mudur ī bunem, wau ifenēya ado wau inosiya ā bun isif.

Jesus ī ada nigin wau laaf fen, yogon naud bunem, ada neda mosor bun tamal yalelnadan. ⁶ Agef fen, ī ada yogon Tama Negur aruna yaleya nigin, in tano ado in pris inodan. Ī bun fula fiya medeīya ado megeir gai gai ibodkalauf! Momoi.

⁷ Log, ī lalo bunem isif.

Age fe di, meleid ganān ī dilouf,
idi ī gilī difen anidig dilouf.

Age fe di, tamo kayau tenebur ein ganān ī nigin waud gudū fouf.

KURŌ FESIYA OD 1:8 KURŌ FESIYA OD 1:20

Are agef bagai wō youf! Momoi.

⁸ Odug Negur irok, “Aya uyulil ado idikeleya, aya gama abodok, kulu abodon, dumen asiyouf, aya saa ilun nē kusī tamo guri afeid uyu aroudig anī.”

Taka Ī Tamo Naal Gen

⁹ Aya Jon, āgenei tureī, aya, Jesus bun darau, Negur nē tano ado, feseya sā ifareya, ā geid taledig, aya Negur nē od ado Jesus nē od wogō aun nigin, Patmos nuyo bun abodon.

¹⁰ Odug nē naa bun, aya Awa Uur namen abod ken, aya dumeun ait odug taur gen wō ye mog, karī aun. ¹¹ Ait iron, “Ereb ō ulef anī, buk kori fiya bun utot fen, sios sewen bun sur wediyouf, oun Efesus, Smerna, Pergamum, Taiataira, Sardis, Filadelfia ado, Laodisia.”

¹² Aya ait wogō fiyan anī ileya nigin falei aun. Aya falei aul fen, lam nē gol tutur sewen ailedin. ¹³ Lam tutur anī atun, aib taka “tamo naal gen”^{*} kolos meluk ifonū di, yen isilen ado, let gol akor gu fen anī ifaren. ¹⁴ In mudur ado fatiya, sipsip siwi lalau, saa lalo lalau gen, yogon mala are yā mala fitotoleya gen. ¹⁵ Yogon ye are bras yā malan ifalegeya medeīya gen, in ait are naan uhuhuya gen. ¹⁶ Yogon ima biyalē barisa sewen iron, agef fen, in awa bun tamal, dimig bala waila si sitakā wō yen. Yogon nawa are gaa ririya gen medeī yen.

¹⁷ Aya ĩ ail fen, aya ĩ ye gariyan kubū au, laa gen ainen. Age afe di, ĩ ima biyalē aya teteun ino fen, iron, “Ō to kumī wo. Aya gariya, aya idikeleya. ¹⁸ Aya mata ibodōya nē, aya laa fiyan, anī ere, uleyaf, aya gai gai mata abodkalauf! Aya laa nē ado Hades nē ki aroudif.

¹⁹ “Anī nigin, erab ō ulen, erab gama ibodok, erab dumen wō youf anī utot. ²⁰ Barisa sewen aya imau biyalē ulen ado, lam nē gol tutur sewen ulen anī nē waa nē

* **1:13:** Daniel 7:13

gariya, are eig fiya: Barisa sewen are sios sewen neid engel, lam nē tutur sewen are sios sewen.

2

Efesus Sios Bun Od Ilef

¹ “Efesus sios nē engel bun utot:

Od enei are, ī barisa sewen ima biyalē irou mog, sewen gol lam tutur difaren atun iyok ilen nē od: ² Ereb ō ago wof, are aya keleī, ogon kabī total yaleya ado ogon feseya sā ifareya anī. Aya keleī, ō tamo sesen to loloum weid fen, idi dogo anī aposel dedig, anī ere, aposel sā anidi es wiyeīd fen, idi neid idegēya anī ulen. ³ Ō total ufar fen, neu yanau nigin morō faali won, anī ere, ō to fō yon.

⁴ Anī ere, aya ō nigin od enei ado: Ō uruwa aya nigin waū laa fen anī utoron. ⁵ Anī nigin, ō nainenem kubū won anī kisi wo! Falei wo fen, ereb uruwa agon anī agouf. Ō to falei wouf are, aya ō gein asi fen, ogon lam tutur ado yogon modoū bun tamal alelauf. ⁶ Anī ere, tobonunā biya enei ō ado: Ō Nikolas dō difiyek neid tobonuneid to oroyōdig, are ayag to oroudig.

⁷ Taka ī weder adouf, utornēg len, ī Awa Uur sios irokenēdif anī karī youf. Aib ī kusī anī wal fouf, aya ī mata ifenēya nē aa Negur nē paradis bun ibodok anī bun tamal, yōya nigin yo afiyēf.

Smerna Sios Bun Od Ilef

⁸ “Smerna sios nē engel bun utot:

Od enei are, ī gariya ado idikeleya, ī laaf fen, baban mata fā yen nē od. ⁹ Ogon darau ado ogon maleg nigin aya keleī, anī ere, ō safina musei ado. Aya idi dogo nigin Juda tamo dedig, anī ere, idi Juda tamo sā, Satan nē guru fiya anidi neid bou yūya od nigin keleī.

¹⁰ Ereb mogo ò darau ifonõf nigin to kumĩ wo. Aya ò arokonok, Satan ĩ mogo ã tunĩ kisi yeĩya nigin kalabus bun ineneĩf. Age fe di, ã naa ten darau walogouf. Ō laa bun dinenõfeg, ogon momoiya urou kafĩ walauf, ago di, aya ò mata nē teter kurũ ayõf.

¹¹ Taka ĩ weder adouf, utornēg len, ĩ Awa Uur sios irokenēdif anĩ karĩ youf. Aib ĩ kusĩ anĩ wal fouf, namba tu nē laa ĩ to daũ fiyēf.

Pergamum Sios Bun Od Ilef

¹² “Pergamum sios nē engel bun utot:

Od enei are, ĩ dimig bala waila si sitakã ado nē od. ¹³ Ō ubodok nē an aya keleĩ, an Satan nē sia ibodok. Anĩ ere, ò neu yanau urou kafĩ welef. Antipas, neu dõ fiya biya, aya nigin od wogõ yedig, ĩ Satan ibodok nē āgenei taun an dukesin sain anĩ buneg, ò aya nigin ogon momoiya to folõ welen.

¹⁴ Anĩ ere, aya ò nigin od tunĩ ado: Ō tamo tunĩ an Balam nē keleĩ dirouf anidi ado, Balam ĩ Balak ifelnē di, Balak ĩ Israel tamo kayau yeid tũ fiya nē meein ino fen, idegnēdi di, Israel idi saaf idegēya waitou bun sesewi difen anĩ dokon, noli tobonunã dinon. ¹⁵ Age fiya gen, ò aneg tunĩ Nikolas nē ifelnēya dirouf anidi ado. ¹⁶ Anĩ nigin, waũ falei wo! Sãf are, aya kaisã bagai ò gein asi fen, neu sigorou nē dimig ado idi geid kusĩ auf.

¹⁷ Taka ĩ weder adouf, utornēg len, ĩ Awa Uur sios irokenēdif anĩ karĩ youf. Aib ĩ kusĩ anĩ wal fouf, aya ĩ mana iminēyan ibodok tunĩ afenēf. Aya ĩ meein lalau takag, yana mata teten itoton anĩ afenēf. Aib ĩ anĩ yalef dogol yana anĩ keleĩ youf.

Taiataira Sios Bun Od Ilef

¹⁸ “Taiataira sios nē engel bun utot:

Od enei are Negur Naal nē od, yogon mala are yā mala fitotoleya gen, yogon ye are bras yā malan ifalegeya medeīya gen. ¹⁹ Aya keleī, ō ereb agof, ogon waū laa fiya ado momoiya, ogon aruna yaleya ado feseya sā ifareya. Aya keleī, ō uruwa bun ago won anī wal fiya gama ō agodig.

²⁰ Anī ere, aya ō nigin od enei ado: Ō kayau Jesebel, ī yogo nigin profet kayau yef anī, loloum wedig. Ī yogon ifelnēya bunem neu ferfer idegnēdi di, idi noli tobonunā bun dile fen, saaf idegēya waitou sesewi difen anī dōdig. ²¹ Aya ī yogon mosor nigin wau falei youf nigin sain afenen, anī ere, ī to orof. ²² Anī nigin, aya ī darau nē fatar bun ara ken, idi ī geid seseirā dinodig anidi, kayau anī nē naab nigin waud to falei youf are, aya idi darau fatuk bagai afenēdiyof. ²³ Aya ī gere tar adenkesiyof. Age afe di, sios ganan, aya waud ado kisi es afedig anī keleī youf. Age afe fen, aya ā mugu mugu ereb ereb ā ago gef kilei, mala solo afeneīf. ²⁴ Anī ere, aya ā tunī ganan Taiataira ufaregef anī arokeneik, ā kayau anī nē ifelnēya to uroug fen, Satan nē waa namen bagai dedig anī to kelein anī arokeneik (aya ā bun ereb morō taka to afeneīf). ²⁵ Ereb ā urougef anī dogol urougef uleg mog, asiyof.

²⁶ Aib ī kusī anī wal fe fen, neu oroya dōf ile, idikeleya bun ouf, aya ī teneub lo fediya nigin megeir afenēf.

²⁷ Ī ain manig nem ulum irokenēdiyof,

ī mis gen daū fedi di, urud falaisiyof,*
are aya neu Dei bunem megeir alen gen. ²⁸ Aya ī bonimeī nē barisa kilokilog afenēf. ²⁹ Taka ī weder adouf, utornēg len, ī Awa Uur sios irokenēdif anī karī youf.

* 2:27: Sam 2:9

3

Sardis Sios Bun Od Ilef

¹ “Sardis sios nē engel bun utot:

Od enei are, ī Negur nē uur sewen ado barisa sewen irouf anī nē od. Ō ereb agof, are aya keleī. Ō mata ubodok dedig, anī ere, ō laa yon. ² Fã wale! Ereb mogo laa fou fenē anī megeir wenē, ere nigin, aya ō ereb agof are neu Negur nē mala bun tutuk bagai sã ailef. ³ Anī nigin, ereb ō walen, ereb ō karī won anī karī walauf. Anī dō wo fen, waū falei wo. Ō to fã walouf are, aya bē tamo gen asiyouf. Aya sain nanī be, ō gein asiyouf anī, ō to keleī youf.

⁴ Anī ere, ō, Sardis an tamo kayau tunī, idi neid kolos amuyē fiya sã difaref anidi ado. Idi kolos lalau difoun ken, aya geid mayōf, ere nigin, idi kisi feleya bagai. ⁵ Aib ī kusī anī wal fouf, ī idi gen kolos lalau ifonūf. Aya yogon yana, mata ibodōya nē buk bun tamal to alelauf, age afe fen, yogon yana neu Dei ado yogon engel meleid bun kurō afesiyouf. ⁶ Taka ī weder adouf, utornēg len, ī Awa Uur sios irokenēdif anī karī youf.

Filadelfia Sios Bun Od Ilef

⁷ “Filadelfia sios nē engel bun utot:

Od enei are, ī fateul bagai ado momoi nē od, ī Dawid nē ki irouf. Ereb ī kā fef, taka nem to inolalauf, agef fen, ereb ī inolelef, taka nem to kā falauf. ⁸ Ō ereb agof, are aya keleī. Ulef, aya, sukar kā feleya taka nem inoleleya kisi felya sã anī, ō wagen anon. Aya keleī, ō megeir naal bagai ado, anī ere, ō neu od dō wo fen, neu yanau to wa won. ⁹ Ulef, idi Satan nē guru fiya namen temeleid, idi dogo nigin Juda tamo dedig, anī ere, idi Juda tamo sã, idegēya tamo anī, ayam age afe di, idi disi, ō yē gariyan kubū de fen, aya ō nigin wau laa fedig anī idi keleī youf.

¹⁰ Ō feseya sã ufarauf nigin neu od urou kafĩ welen anĩ nigin, ayag idi tenebur dibodok kisi fediya nigin teneub ganan bun darau isiyouf sain bun, aya ō ahaha ayōf.

¹¹ Aya kaisã bagai asiyouf. Ō ereb urouf anĩ kafĩ walauf, ago di, taka nem ogon kurũ fiya nē teter anĩ to yalouf. ¹² Aib ĩ kusĩ anĩ wal fouf, aya, neu Negur nē tempel bun, ĩ monog tor atennēf. ĩ anĩ baban to bagai itorōf. Aya ĩ bun, neu Negur nē yana ado, neu Negur nē taun yana, Jerusalem mata, are saa ilun tamal neu Negur bunem isiyouf anĩ atotauf. Age afe fen, aya neu yanau matag ĩ bun atotauf. ¹³ Taka ĩ weder adouf, utornēg len, ĩ Awa Uur sios irokenēdif anĩ karĩ youf.

Laodisia Sios Bun Od Ilef

¹⁴ “Laodisia sios nē engel bun utot:

Od enei are Momoi Barikã nē od, ĩ dō fiya biya ado, momoi bagai Negur nē od wogō yedig, ĩ ereb ereb Negur inodin ganan nē gariya. ¹⁵ Ō ereb agof anĩ aya keleĩ, are ō medir sã, uruwag sã. Aya ō medir be, uruwa anĩ taka ubodok nigin orouf. ¹⁶ Anĩ nigin, ō laigog, medir sã, uruwag sã nigin, aya ō mogo awau bun tamal atigil arāyōf. ¹⁷ Ō urōdig, ‘Aya safina ganan kisi feleya, aya safina musei alen nigin, aya ereb taka to lau afedig,’ wodig. Anĩ ere, ō keleĩ sã, ō gai sane bagai, malalon ado, maleg, malã ifofakeleya ado, gemũ ubodok. ¹⁸ Aya ō arokonok, ō aya bun gol bagai, gol yã bun difalegen anĩ, ō safina ganan kisi feleya bagai wō wouf nigin, na walouf, ō kolos lalaug ufonũ di, ogon gemũ mama dede wouf nigin na walouf, ō mala marasin malã bun uno fen, kelē walauf nigin na walouf.

¹⁹ Aya idi nigin wau laa fedig anidi, aya ou afeid fen, tai afedidig. Anĩ nigin, kabĩ totol wale fen, mosor utor ken, waũ falei wouf. ²⁰ Lo weleg, aya bobogē afar fen,

godu afef. Taka ĩ aitou karĩ ye fen, sukar kã foug are, aya ĩ namen asi fen, ĩ ado saaf mǎf, age afe di, ĩ aya ado saaf mǎf.

²¹ Aib ĩ kusĩ anĩ wal foug, aya kusĩ wal afe fen, neu Dei nē king nē sia bun, neu Dei ado mabodok gen, ĩg neu king nē sia bun, aya ado mabodōf nigin yo afiyēf.

²² Taka ĩ weder adouf, utornēg len, ĩ Awa Uur sios irokenēdif anĩ karĩ youf.”

4

King nē Sia Saa Ilun Ibodok

¹ Anĩ bure fele di, aya kelē aulen, aya wageun an saa ilun nē sukar kã feleya ifar mog, ailen. Age afe fen, ait aya uyulil taur gen wogō fiya di, karĩ aun are iron, “Ein use, ago di, erēb enei bure fele di, wō youf anĩ, afelnōf.”

² Kaisā bagai aya Awa Uur namen abodon, age afe fen, wageun an saa ilun king nē sia bun, aib taka ibodon anĩ ailen. ³ Agēf fen, taka an ibodon are, lo fiya bun meein medeīya jaspā ado meein giriya medeīya konilian gen wō yen. Walol taka, meein aarau mata age fiya medeīya emeral gen sof fen, king nē sia anĩ kalilĩ fen. ⁴ King nē sia anĩ sirin, tuwenti-fo king nē sia anim salili de fen, tuwenti-fo mudur adodo anĩ bun dibodon. Idi kolos lalau difoun ken, dogo neid mudureid bun king nē gol teter ado dibodon. ⁵ King nē sia bun kolimei filiya firagagaũ fe sof fen, gurūya odug wō ye di, kolimei gudū yen. King nē sia wagen lam sewen futu redin, are Negur nē awa uur sewen anĩ. ⁶ Takag, king nē sia wagen, erēb taka maāĩ gen galas nem dinon anĩ, galas medeīya bagai age fiya ibodon.

Anĩ atun king nē sia salili fiya bun, erēb mata ibodōya aiwa adodo difaren. Idi meleid barikā, wagedin ado dumedineg. ⁷ Erēb mata ibodōya uyu ifaren are laion gen, anĩ dō fiya are bulmakau gen, anĩ dō fiya are nawa, tamo

nawa gen, anĩ dō fiya are webi fatutu yef gen. ⁸ Ereb mata ibodōya aiwa adodo idi mugu mugu wayeid sigis ado fen, bouweid ganan bun meleid barikā, wayeid farumēg meleid ado. Bō ado gaa ado, idi eig yeya to folō difeledig:

“Fateul, fateul, fateul

are Odug Negur saa ilun nē kusī tamo guri feid uyu
iroudig anĩ,

ĩ kulu ibodon, ĩ gama ibodok, ĩ dumen isiyouf.”

⁹ Ereb sain ereb mata ibodōya idi, taka ĩ king nē sia bun ibod ken, mata faimud ibodkeleya anĩ bun, fula fiya medeīya, yana odug ado, de fiyēya difenēdig bun, ¹⁰ mudur adodo tuwenti-fo, ĩ king nē sia bun ibod mog, ĩ wagen kuku de fen, ĩ mata faimud ibodkeleya anĩ seli dalesedig. Idi king nē sia wagen dogo neid teter gō difel fen, dirōdig:

¹¹ “Nemā Odug Negur,

ō fula fiya medeīya, yana odug ado, megeir yaleya kisi
feleya bagai,

ere nigin, ō ereb ereb ganan ago di, wowā den,
ago fen, ogon oroya bunem idi unodi di,
age de difaref.”

5

Buk Kori Fiya Ado Sipsip Naal

¹ Age de di, aya ĩ king nē sia bun ibodon anĩ ima biyalē, buk kori fiya si sitakā itotoya ado uris sewen nem ĩtā de fen, sile fiyan anĩ ailen. ² Age afe fen, aya engel megeir ado taka ailen, ĩ ait odugem iweig iron, “Aim uris eneidi narĩ feid fen, buk kori fiya enei fara feleya kisi feleya?” ³ Anĩ ere, saa ilun be, tenebur be, teneub farumen tamal, taka nem buk kori fiya anĩ fara feleya be, namen fele fiya kisi feleya sã. ⁴ Aya fatuk bagai inã alen, ere nigin, taka nem buk kori fiya anĩ fara feleya be, namen fele fiya kisi feleya

to wō yen. ⁵ Age afe di, mudur adodo takam aya irokanan, “To inā wale! Ulef, Juda nē ibor bun tamal Laion, Dawid nē Warei mogo kusī wal fen. Inim, sã buk kori fiya anī yogon itāfiya uris sewen ado fara falauf.”

⁶ Age ye di, aya Sipsip Naal dukessin anī gen, king nē sia ereb mata ibodōya aiwa adodo salili difiyen ado, mudur adodo atun ifar mog, ailen. Ī karat sewen ado mala sewen ado, mala sewen are Negur nē awa uur sewen teneub ganan bun susur fedin anidi. ⁷ Sipsip Naal ĩ isi fen, ĩ king nē sia bun ibodon anī nē ima biyalē buk kori fiya anī yalen. ⁸ Sain ĩ anī yalen, ereb mata ibodōya aiwa adodo, mudur adodo tuwenti-fo geid, Sipsip Naal wagen kuku den. Idi mugu mugu harp* ado beī gol nem kaau sumeī biya isokoseya ado guri difen, kaau sumeī biya are momoiya tamo kayau neid kosē. ⁹ Age de fen, idi seg mata dalen:

“Ō buk kori fiya anī wale fen,
 yogon itāfiya uris sewen anī fara feleya kisi feleya
 bagai,
 ere nigin, ō dinōkesi di,
 ō ogon naud bunem
 ibor ganan bun, od fire fire ganan bun, tamo kayau
 ganan bun ado, teneub ganan bun, Negur nē tamo
 kayau na waledin.

¹⁰ Ō idi neda Negur aruna dalouf nigin, tano ado pris unenēdin,
 ago di, idi teneub ganan lo fiya nigin mudur dibodōf.”

¹¹ Age de di, aya malau ara ken, engel musei bagai neid aiteid karī aun, idi tausen musei ado handred tausen musei wal fiya. Idi king nē sia, ereb mata ibodōya ado, mudur adodo salili difiyēdin. ¹² Age de fen, idi aiteid odugem seg dalen:

* **5:8:** Harp anī gita gen musik kodē dedig.

“Sipsip Naal dukessin ï
megeir, safina, kisi biya, totol, yana odug, fula fiya
medeïya ado,
yana yaleseya yaleya kisi feleya bagai!”

¹³ Agef fen, aya, erab erab ganana saa ilun difaref,
tenebur difaref, teneub farumen difaref ado, maaï bun
difaref, erab erab ganana anï namen mata difaref idi seg
dale mog, karï aun:

“Ï king nē sia bun ibodok ado Sipsip Naal bun,
yana yaleseya, yana odug, fula fiya medeïya ado, megeir,
gai gai ibodkalauf!”

¹⁴ Erab mata ibodōya aiwa adodo diron, “Momoi,” age de
di, mudur adodo kuku de fen, yana dalesen.

6

Ïtāfiya Uris

¹ Aya lo afe mog, Sipsip Naal ïtāfiya uris sewen anï uyulil
fara fen. Age fe di, aya, erab mata ibodōya aiwa adodo
takam, ait kolimei ait gen bun eig ye mog, karï aun, “Usi!”

² Aya lo afen, aya wageun an hos lalau taka ifaren. Tamo
anï teten ibodon ï wi taka iroun, ï kusï wal fiya nē teter
ifenen, age fe di, ï hos bun kusï wal fe fen, kusï wal fediyouf
nigin ilen.

³ Sipsip Naal ï ïtāfiya uris uyulil dō fiya anï fara fen, age
fe di, aya erab mata ibodōya uyulil dō fiya anï eig ye mog,
karï aun, “Usi!” ⁴ Age ye di, hos taka isin, are giriya bagai.
Tamo anï teten ibodon ï, tenebur tamal malol yalel fen,
tamo abob didenkesiyouf nigin megeir ifenen. Ï anï dimig
odug ifenen.

⁵ Sipsip Naal ï ïtāfiya uris anï dō fiya fara fen, age fe di,
aya erab mata ibodōya anï dō fiya anï eig ye mog, karï aun,
“Usi!” Aya lo afen, aya wageun an hos karos taka ifaren.
Tamo anï teten ibodon, yagon ima bun ï foi fiya nē safina

iroun. ⁶ Age fe di, aya ereb mata ibodōya aiwa adodo atun ait taka gen karī aun are iron, “Naa tekelei nē mala solo wit bret tekelei yalouf, naa tekelei nē mala solo baali bret towo yalouf. Ago fen, oliv mouf ado wain to daū wo!”

⁷ Sipsip Naal ī itāfiya uris anī dō fiya fara fen, age fe di, aya ereb mata ibodōya anī dō fiya anī eig ye mog, karī aun, “Usi!” ⁸ Aya lo afen, aya wageun an hos bailuya taka ifaren. Tamo anī teten ibodon ī yana Laa, age fe di, Hades ī degē degē fiyen. Idi tenebur tamo kayau aiwa adodo foi fiya atun taka anī, dimig nem, kadir nem, dagi odug nem ado, tenebur gaar kuī nem didenkesiyouf nigin megeir ifenēdin.

⁹ Sipsip Naal ī itāfiya uris anī dō fiya fara fen, age fe di, aya idi Negur nē od dale fen, feseya sā od anī wogō de di, didenkesin anidi neid meleidkanon alta farumen ailedin. ¹⁰ Idi aiteid odugem diweig diron, “Ereb ereb ganan nē Odug, fateul fen momoi, ere sain bun bagai, ō tenebur tamo kayau es woid fen, idi amā didenamakesin nigin mala solo wenēdiyouf?” ¹¹ Age de di, idi mugu mugu kolos lalau meluk ifenēdin, agef fen, idi naal sain meluk tari de mog, dogo neid kabī tureid tar ado momoiya tamo kayau Negur igirnēdin ganan, idi age difedin gen didenkesiya kisi falauf nigin irokenēdin.

¹² Aya ī itāfiya uris anī dō fiya fara fel mog, ailen. Age fe di, mimī odug wō yen. Gaa gugum kel fen, wau gudū fiya nē gabar meme siwi nem iwaya gen karos kelen. Ogō oditekei naud giriya gen falei felen. ¹³ Age fe di, saa ilun barisa tenebur kuku ren, are aa fig faat dobi yau totolem yoū fe di, kuku redig gen age fen. ¹⁴ Saa, pepa kori fiya gen iwaikelen, agef fen, arei ganan ado nuyo ganan, dogo neid modoū ditoraran.

¹⁵ Age fe di, tenebur nē king, tamo yeneid adodo, kusī mudur, safina musei adodo, megeir adodo ado, ferfer

ganan ado tamo kafī fiya sã bun difaref ganan, kuren ado arei nē sa atun diminanan. ¹⁶ Idi arei ado sa diweig dirokenēdin, “Tetenaman kubūg fen, ī king nē sia bun ibodok anī nawa ado Sipsip Naal nē didi bun tamal unokolnamāg! ¹⁷ Ere nigin, idi neid didi nē naa odug mogo isin, anī nigin, aim ifareya kisi feleya?”

7

Israel Tamo Kayau 144,000 Bun Uris Dinon

¹ Anī bure fele di, aya engel aiwa adodo, teneub idikeleya uyu uyu aiwa adodo bun, difar fen, teneub uyu uyu aiwa adodo nē yau, yau takam teneub be, maaī be, aa taka bun to fū fouf nigin kafī difel mog, ailen. ² Age afe fen, aya engel taka mata ibodōya Negur nē itāfiya uris ado gaa iseyan ise mog, ailen. Ī engel aiwa adodo teneub ado maaī daū fiya nē megeir ifenēdin anidi, ait odugem iweig irokenēdin: ³ “Ā teneub be, maaī be, aa taka fau mog to daūg, amā neda Negur nē ferfer demeid bun itāfiya uris manol len.” ⁴ Age ye di, aya idi itāfiya nē uris dinon anidi ganī anī karī aun, are 144,000 idi Israel ibor ganan bun temeleid.

⁵ Juda nē ibor bun tamal 12,000 are itāfiya uris dinon,

Ruben nē ibor bun tamal are 12,000,

Gad nē ibor bun tamal are 12,000,

⁶ Aser nē ibor bun tamal are 12,000,

Naftali nē ibor bun tamal are 12,000,

Manase nē ibor bun tamal are 12,000,

⁷ Simeon nē ibor bun tamal are 12,000,

Lewi nē ibor bun tamal are 12,000,

Isakar nē ibor bun tamal are 12,000,

⁸ Sebulun nē ibor bun tamal are 12,000,

Josef nē ibor bun tamal are 12,000,

Benjamin nē ibor bun tamal are 12,000.

Guru Fiya Mala Odug Kolos Lalau Meluk Difonundin

⁹ Anĩ bure fele di, aya lo afen, aya wageun an guru fiya mala odug bagai, taka nem iwesleya kisi feleya sã, idi teneub ganan bun, ibor ganan bun, tamo kayau ganan bun ado, od fire fire ganan bun temeleid, idi king nē sia wagen ado Sipsip Naal wagen difaren. Idi kolos lalau meluk difoun ken, pam boge anã boge gen anĩ imedim guri difen. ¹⁰ Age de fen, idi aiteid odugem diweig diron:

“Kel gei fiya are

neda Negur king nē sia bun ibodok ado

Sipsip Naal nē.”

¹¹ Engel ganan, king nē sia ado, mudur adodo ado, ereb mata ibodōya aiwa adodo salili difiyeid difar fen, king nē sia wagen neweid lē kuku de fen, Negur yana dalesen.

¹² Idi diron:

“Mmoi!

Yana yaleseya, fula fiya medeĩa,

kisi biya, de fiyēya, yana odug,

megeir ado, total are

neda Negur bun gai gai ibodkalauf.

Mmoi!”

¹³ Age de di, mudur adodo takam aya to fiyan, “Idi eneidi kolos lalau meluk difonun are nanidim, idi nainenem disin?”

¹⁴ Aya ĩ arokenen, “Tamo biya, õ keleĩ.”

Age au di, ĩ irokanan, “Eneidi are darau, kafĩ fiya odug bun temeleid disin. Idi dogo neid kolos meluk Sipsip Naal naud nem kulo dife di, lalaun. ¹⁵ Anĩ nigin,

“idi Negur nē king nē sia wagen difar fen,

yogon tempel bun gaa ado bõ ganan aruna daledig.

Age dife di, ĩ king nē sia bun ibodok anim yogon salafat biraraũ fe fen, kerũ fediyouf.

¹⁶ Idi baban to naũ fediyouf,

to naan ail fediyouf.

Gaam be, ereb uruwa adom,

baban to isaĩnēdiyof.

¹⁷ Ere nigin, Sipsip Naal king nē sia atun ifaref inim, dogo neid lo fiya tamo ibodōf.

Ī idi mata ibodōya nē naan warur bun gurif iroulediyouf.

Age fe di, Negur ĩ idi meleid bun tamal maruid ganan waĩ falauf.”

8

Ītāfiya Uris Namba Sewen Ado Aa Gaula Sumeĩ Biya Nē Gol Beĩ

¹ Sain Sipsip Naal ĩtāfiya uris namba sewen anĩ fara fele di, saa ilun hap aua age fiya karasā sā mutū bagai yenen.

² Age fe di, aya engel sewen Negur wagen difaren anidi, taur sewen ifeneĩd mog, ailen.

³ Engel taka ĩ, aa gaula sumeĩ biya nē gol beĩ ado isi, alta bun ifaren. Ī aa gaula sumeĩ biya musei, momoiya tamo kayau ganan neid kosē ado, king nē sia wagen gol alta bun sesewi foug nigin difenen. ⁴ Aa gaula sumeĩ biya nē kaau, momoiya tamo kayau neid kosē ado, engel ima bun tamal Negur wagen iselen. ⁵ Agef fen, engel aa gaula sumeĩ biya nē beĩ yale, alta bun tamal yā ife fen, tenebur iran, age fe di, kolimei gudūya, gurūya odug, kolimei filiya ado, mimĩ wō yen.

Taur

⁶ Age fe di, engel sewen taur sewen ado, taur wese fiya nigin dodok difen.

⁷ Engel uyulil yogon taur wese fe di, uyē ais, yā naud ado bagu fen, isi di, tenebur iraran, age fe di, teneub tekelei faraf towo fiya gen anĩ taka adok isaikelen, aa ganan faraf towo fiya gen anĩ taka adok isaikelen, agef fen, fisir mata ganan isasaikelen.

⁸ Engel uyu wō yen anī dō fiya yogon taur wese fe di, ereb arei odug gen yā fitotoleya ado maaīwō iran. Maaī faraf towo fiya gen anī taka, naud falei felen, ⁹ maaīwō ereb ereb mata ibodōya faraf towo fiya gen anī taka gare den, agef fen, waag ganan faraf towo fiya gen anī taka daū felen.

¹⁰ Anī dō fiya engel taka yogon taur wese fe di, barisa odug yal gen kaur fen, saa ilunem, naan faraf towo fiya gen anī taka bun ado, naan warur anidi bun kubū yen.

¹¹ Barisa anī nē yana Dirikeī. Naan faraf towo fiya gen anī taka dirikeī kele di, tamo kayau musei, naan dirikeī kelen anī bunem gare den.

¹² Anī dō fiya engel taka yogon taur wese fe di, gaa faraf towo fiya gen anī taka, ogō faraf towo fiya gen anī taka ado, barisa faraf towo fiya gen anī taka yū di, idi ganan faraf towo fiya gen anī taka gugum kelen. Naa faraf towo fiya gen anī taka lalan sa kelen, agef fen, bō faraf towo fiya gen anī takag age fen.

¹³ Aya lo afe mog, aya webi taka karī au mog, ilun fatutu ye fen, ait odugem iweig iron, “Malalon! Malalon! Malalon tenebur dibodok anidi bun, ere nigin, engel towog mogo taur ait wese difou fenē!”

9

¹ Engel anī dō fiya engel taka yogon taur wese fe di, aya barisa taka saa ilunem tenebur kubū yen anī ailen. Barisa are ku isil idiya sā nē ki anī ifenen. ² Ī ku isil idiya sā anī kā fele di, kaau are yā odug kū fiya modoū bun tamal gen fā yen. Ku isil idiya sā bun tamal kaau anim, gaa ado saa gugum kelen. ³ Age fe di, kaau namen tamal, totobi tenebur wowā den, are idi neid megeir, tenebur ābei neid megeir gen ifenēdin. ⁴ Idi tenebur tamal fisir be, ereb aayū be, aa taka to daū difouf, anī ere, tamo

kayau idi Negur nē uris demeid bun sã anidi dogol daũ difediyouf nigin irokenēdin. ⁵ Idi tamo idenkesiya nē megeir to ifenēdin, anī ere, idi ogō faif bun darau dogol difenēdiyof nigin megeir ifenēdin. Age fe di, idi neid darau arar, ābei tamo garū fe di, darau arar iledig gen. ⁶ Naa anidi bun tamo laa dimirēf, anī ere, to dilouf. Idi laa orodiyof, anī ere, laa to gurug fediyof.

⁷ Totobi are hos kusī bun ileyā nē gegen. Idi neid mudureid bun, ereb gol teter gen kurū difedin, idi neid neweid tamo neweid gen. ⁸ Nedi fatiyeid kayau fatiyeid gen, agef fen, waileid are laion waila gen. ⁹ Nedi siot kapa are ain nē siot kapa gen, agef fen, idi neid wayeid furūya are hos musei ado karis kusī bun gududu de fen, gou redig gen. ¹⁰ Idi ibud ado waileid ābei neid gen, agef fen, idi ibud nem ogō faif bun tamo kayau darau difenēdiyof nigin megeir adon. ¹¹ Idi uyu iroukenēdiya nē king ado, are ku isil idīya sã nē engel, in yana Hibru od nem are Abadon, Grik od nem are Apolion.*

¹² Morō odug uyulil anī bure felen, age fe di, morō odug uru are fau disif.

¹³ Engel namba sigis anī yogon taur wese fe di, aya ait taka gol alta Negur wagen ifaref anī nē karat aiwa adodo bunem wowā yeid mog, karī aun. ¹⁴ Ait are engel namba sigis taur ado anī irokenen, “Engel aiwa adodo Yufretis naan odug bun difofan anidi fara woidle.” ¹⁵ Age ye di, engel aiwa adodo are aua, naa, ogō, yar enei bun bagai, tamo teneub ganān bun fara fiya towo anī taka adok didenkesiyof nigin, dodok fedin anī folō feledin. ¹⁶ Hos teten kusī bun ileyā nē tamo anidi are 200 milion. Aya dogo neid namba karī aun.

* **9:11:** Abadon ado Apolion nē gariya, Daũ Fiya Tamo.

¹⁷ Aya malau seleulã kurã fiya bun, hos adodo tamo hos tetedin dibodon anidi eig fiya ailedin: Idi neid siot kapa are, yã giriya gen, maaĩ gegẽ gen ado, bailuya salfa gen. Hos mudureid are, laion mudureid gen, agef fen, idi eweid bunem yã, kaau ado, salfa wowã yen. ¹⁸ Tamo tenebur ganan faraf towo fiya gen anĩ taka ganan, sane towo anim, yã, kaau ado, salfa idi eweid bun wowã yen anim didenkesin. ¹⁹ Hos idi neid megeir are eweid bun ado ibud bun ibodon, ere nigin, idi neid ibud are gogour gen fen, mudureid anim tamo kayau darau difenēdidig.

²⁰ Tamo kayau tunĩ ganan, sane eneidim to didenkesin anidi, idi imedim dinon anĩ to ditor ken, waud to falei yen. Idi kaa sesen yeneid yaleseya to ditor ken, gol, silwa, bras, meein ado, aa nē idegēya waitou, are lo fiya, kariya be, iyōya kisi felya sã anidi yeneid yaleseya itorōya sã. ²¹ Idi tamo yukesiya, dogo neid idegēya kosēya, dogo neid noli tobonunã be, dogo neid bē yaleya tobonunã nigineg waud to falei yen.

10

Engel Ado Buk Kori Fiya Naal

¹ Anĩ bure fele di, aya engel megeir ado taka saa ilunem isi mog, ailen. Ĩ lalom silef fen, yogon mudur bun walol ado. In nawa gaa gen, agef fen, yogon ye are tor yã bobo reya gen. ² Ĩ buk kori fiya naal taka ima bun fara feleya iron. Ĩ ye biyalē maaĩ bun iten ken, ye kilē teneub bun itenen. ³ Agef fen, ĩ laion ninirã ye gen ken, ait odugem iweig iron. Sain ĩ iwegin, kolimei gudūya sewen neid aiteid wogō den. ⁴ Kolimei gudūya sewen wogō de di, aya anĩ atotau fenē age afen, anĩ ere, aya ait taka saa ilunem eig ye mog, karĩ aun, “Ereb kolimei gudūya sewen wogō den anĩ bun itãfiya uris uno fen, ò to utotauf.”

⁵ Age ye di, engel maaĩ bun ado teneub bun ifar mog ailen, are ima biyalē saa ilun yalesen. ⁶ Agef fen, engel ĩ, Negur gai gai mata ibodkeleya, saa ado ereb ereb ganan anĩ bun difaref, teneub ado ereb ereb ganan anĩ bun difaref, maaĩ ado ereb ereb ganan anĩ bun difaref inodin anĩ yana nem, wau kuturol fen, iron, “Foiya nē sain sāl! ⁷ Anĩ ere, engel namba sewen anĩ yogon taur wese foug naa bun, Negur nē waa, ĩ yogon ferfer profet irokenēdin kilei, agef wō ye kisi falauf.”

⁸ Anĩ bure fele di, ait saa ilunem aya irokana di, karĩ aun, are baban irokanan, “Ule, engel maaĩ ado teneub bun ifaref anĩ ima bun, buk kori fiya fara feleya irouf anĩ wale,” yen.

⁹ Age ye di, aya engel garan ele fen, buk kori fiya naal anĩ ifanauf nigin arokenen. ĩ aya irokanan, “Are wale wō wakas. Are ō namē bun dirikeĩ youf, anĩ ere, ō awā bun are nin te gen dan yōf.” ¹⁰ Aya buk kori fiya naal engel ima bun tamal ale on. Are neu awau bun nin te gen dan fiyan, anĩ ere, aya akalaisile di, nameun dirikeĩ fiyan. ¹¹ Age afe di, idi aya dirokanan, “Ō tamo kayau musei, teneub musei, od musei ado, king musei nigin, baban profet od wogō wouf.”

11

Od Megeir Fiya Nē Isennēya Tamo Uru

¹ Aya sisi fiya nē tibog gen werĩ taka ifana fen, irokanan, “Ule fen, Negur nē tempel ado alta sisi wo fen, Negur yana an ganim dalesedig anĩ uwes. ² Anĩ ere, tempel fofomala anĩ utor. Are to sisi wo, ere nigin, are haiden ifenēdin. Idi foti-tu ogō bun taun fateul anĩ lai difalau. ³ Age dife di, aya neu od megeir fiya nē isennēya tamo uru megeir afenēdi di, idi 1,260 naa anidi bun wau gudū fiya nē gabar difoun ken, profet od kurō difesiyouf.” ⁴ Eneidi are oliv aa uru ado lam tutur uru, tenebur nē Odug wagen difaref.

⁵ Takam idi darau ifenēdiya nigin age fouf are, yā eweid bunem wō ye fen, idi neid kiwai tar oditekei yakur falauf. Aibem taka idi darau ifenēdiyoyou fenē age fouf, are agef laa fouf bagai. ⁶ Tamo eneidi saa katī feleya nē megeir ado nigin, idi profet od wogō douf sain, uyē to isiyouf, agef fen, idi naan falei fe di, naud wōya nigin megeir ado fen, erob sain orodif kilei, idi erob sane fire fire bunem teneub yūya nē megeir ado.

⁷ Idi Negur nē od kurō fesiya bure difele di, gaar kuī anī ku isil idīya sã bunem ulō yeis fen, idi geid kusī de, wal feid fen, idenkesiyouf. ⁸ Idi neid bouweid buru taun odug anī nē naabur yenēf, taun are yaab od bunem Sodom ado Isip dedig, an nedi Odugeg aa tetek bun dukesin. ⁹ Tamo kayau fire fire bun tamal, ibor fire fire bun tamal, od fire fire bun tamal ado, teneub fire fire bun tamal, tamo kayau idi, naa towo ado naa taka atun bun, nedi bouweid buru dile fen, mumā difouf nigin to yo douf. ¹⁰ Tamo kayau tenebur dibodok anidi, idi nigin waud al fe di, sifa dino fen, idi abob safina ege luwa difenēf, ere nigin, profet uru eneidi, idi tenebur dibodok anidi darau difenēdin.

¹¹ Anī ere, naa towo ado naa taka atun anī bure fele di, mata neseya nē uur Negur bunem idi namedin ilen, age fe di, idi fafā de difaren. Age dife di, idi diledin are kumī tererē den. ¹² Anī bure fele di, idi saa ilunem ait odug eig ye irokeneid mog, karī den, “Ilun ein useg,” yen. Age ye di, idi neid kiwai lo difeid mog, idi lalo bunem saa ilun diselen.

¹³ Sain anī bun bagai, mimī odug wō ye di, taun anī bun ten tekelei adok daū felen. Sewen tausen tamo kayau mimī anim idenkesin. Age fe di, idi gareya sã are kumī tererē de fen, saa ilun nē Negur fula fiya medeīya difenen.

¹⁴ Morō odug uyu ilen anī dō fiya bure fele di, morō odug anī dō fiya mogo melsã bagai isiyoyou fenē.

Engel Taur Namba Sewen Anĩ Wese Fen

¹⁵ Engel namba sewen anĩ yogon taur wese fe di, saa ilun ait odug wowā ye fen, diron:

“Tenebur nē tano are, neda Odug ado yogon Kristus nē tano wō yen,

age fe di, ĩ gai gai lo fiya nigin anĩ nē mudur ibodōf.”

¹⁶ Age de di, tuwenti-fo mudur adodo, Negur wagen dogo neid king nē sia bun dibodon wageidlē kuku de fen, Negur yana dales, ¹⁷ diron:

“Odug Negur saa ilun nē kusĩ tamo guri weid uyu uroudig anĩ,

ō gama ubodok, kulu ubodon, amā ō de mayok,

ere nigin, ō ogon megeir odug wale fen,

lo fiya nigin king wō won.

¹⁸ Teneub ganau waud sanen, anĩ ere, ogon didi mogo isin.

Tamo gare den anĩ es fediya sain mogo isin,

ogon ferfer profet, ogon tamo kayau fateul ado,

idi ogon yanā nigin anini den anidi nanaal ado odudug,

mala solo ifenēdiya sain mogo isin,

idi teneub daũ difef anidi daũ fediya sain mogo isin.”

¹⁹ Anĩ bure fele di, Negur nē tempel saa ilun kā fele di, yogon tempel namen yogon bar itenēya nē bogis wō yen. Age fe di, kolimei filiya, gurūya odug, kolimei gudūya, mimĩ ado, uyē ais ado odug wō yen.

12*Kayau Ado Gogour Odug*

¹ Uris odug fire bagai saa ilun wō yen. Kayau taka gaa ifoun kel fen, yogon ye farumen ogolam ado, yogon mudur bun barisa tuwelf nē teter kurū fen. ² ĩ bou ado fen, kesu gō fiya sain melsā di, darau nigin kaĩ yen. ³ Age fe di, uris takag saa ilun wō yen. Gogour giriya odug bagai mudur sewen, karat ten ado, teter sewen mudur sewen

bun difaren ado wō yen. ⁴ Yogon ibum barisa fara fiya towo anī taka saa ilun waif, tenebur iraran. Gogour odug anī kayau kesu gō fiya sain melsā anī wagen ifaren, are ī yogon kesu gō falaisi di, itobouf nigin age fen. ⁵ Kayau kesu taka gō fen, are kesu monog, ī teneub ganan ain manig nem ulum irokenēdiyof. Age fe di, yogon kesu kaisā bagai gurar fe yale, Negur ado yogon king nē sia wagen irouselen. ⁶ Kayau, Negurem modoū dodok fenen nē gerere tuan iya ilen, an ī Negurem 1,260 naa kulatun fiyēf.

⁷ Agef fen, saa ilun kusī wō yen. Maikel yogon engel geid, gogour odug geid kusī den. Age fe di, gogour odug, yogon engel geid, abag idi geid kusī den. ⁸ Anī ere, gogour odug in engel geid, idi neid megeir kisi feleya sā, anī nigin, idi saa ilun nedi modoū ditoron. ⁹ Gogour odug bagai are dale diran, are gogour kulu tamal bagai, anī Devil be, Satan dedig, ī teneub ganan idegnēdidig. Ī tenebur dale dira ken, yogon engeleg ī geid diraran.

¹⁰ Age fe di, aya saa ilunem ait odug eig ye mog, karī aun:

“Gama neda Negur nē kel yaleya, megeir, tano ado,
yogon Kristus nē total mogo isin.
Ere nigin, ī neda turada tar bouweid yūya od irōdig,
ī neda Negur wagen, gaa ado bō, idi bouweid yūya od
irōdig,
are mogo dale diran.

¹¹ Idi Sipsip Naal naud bunem ado,
dogo neid Jesus nigin od wogōya bunem
ī wal difiyen.

Idi dogo mata ibodōya nigin kisi fatuk to dale fen,
laa uyu ditoron.

¹² Anī nigin, saa ilun ō ado,
an ufaregef ā, wauī kulī ye!

Anĩ ere, teneub ado maaĩ ã, meleĩlon ado,
ere nigin, Satan mogo ã bun isilen!
Seye ĩ bun isokosef,

ere nigin, ĩ keleĩ, yogon sain mogo modegef.”

¹³ Sain gogour odug ĩ tenebur diran anĩ ile fen, ĩ kayau kesu monog gõ fen anĩ iruf ilen. ¹⁴ Kayau are, gerere tuan modoũ ĩ nigin dodok fenen anĩ bun fatutu ye ilauf nigin, webi odug nẽ waye uru difenen, an kayau gogour odug anim to irounẽf nigin, yar towo ado yar taka atun, kayau anĩ kulatun difiyẽf. ¹⁵ Age fe di, gogour ĩ awa kurenem, naan odug gen, naan foula fen, are kayau anĩ wal fiye ken, kuwei bun yale irousilauf nigin age fen. ¹⁶ Anĩ ere, teneub kayau isenne ken, awa aã ye fen, gogour odug awa kurenem naan odug foula fen anĩ yakasin. ¹⁷ Age fe di, gogour odug kayau nigin fatuk bagai name fen, kayau nẽ ibor tar fau dibodok anidi ganan geid kusiya nigin ilen, idi Negur nẽ ĩtãfiya dõ de fen, Jesus nẽ biya od dirouf anidi.

13

¹ Agef fen, gogour odug maaĩ yerin ifaren.

Gaar Kuĩ Maaĩ Namenem Ulõ Yesin

Age fe di, aya gaar kuĩ taka maaĩ namenem ulõ yeis mog, ailen. ĩ karat ten ado, mudur sewen ado fen, ĩ yogon karat ten bun teter adodo fen, mudur ganan bun Negur kono fiya nẽ yana ado. ² Gaar kuĩ aya ailen are lepat* gen, anĩ ere, yogon ye are bea nẽ ye gegen, agef fen, awa laion nẽ gen. Gogour odug yogon megeir, yogon king nẽ sia ado, total odug, gaar kuĩ ifenen. ³ Gaar kuĩ nẽ mudur taka are dũ di, laa fou fenẽ gen yenen, anĩ ere, dũ di, laa fou fenẽ gen yenen are baban biya len. Teneub ganan terẽ de fen, gaar kuĩ dõ difen. ⁴ Tamo idi gogour odug yana dalesen,

* **13:2:** Lepat are fus kuĩ odug gen.

ere nigin, ĩ gaar kuĩ megeir ifenen. Age de fen, idi gaar kuĩg yana dales fen, diren, “Aim anĩ gaar kuĩ gen? Aim anĩ ĩ ado kusĩ yalesauf?”

⁵ Gaar kuĩ ĩ, yogo seli kulō fiya nē od ado Negur nigin kono fiya nē od wogō youf nigin sigor ifen ken, foti-tu ogō bun kabĩ yalouf nigin megeir ifenen. ⁶ Gaar kuĩ ĩ Negur kono fiyēf nigin, Negur yana, Negur nē ibodōya modoũ ado, idi saa ilun dibodok anidi bun bou yūya od wogō youf nigin awa kamen. ⁷ Gaar kuĩ ĩ, Negur nē tamo kayau geid kusĩ de fen, idi wal fediyouf nigin megeir ifenen. Agef fen, ĩ, ibor ganan, tamo kayau ganan, od fire fire ganan ado, teneub ganan nē mudur ibodōf nigin megeir ifenen. ⁸ Tenebur dibodok anidi ganan gaar kuĩ yana dalesauf, are idi, saa teneub ado kare fen sain bunem isi sain enei bun, idi yeneid Sipsip Naal dukessin anĩ nē mata ibodōya nē buk bun to itoton anidim age difouf.

⁹ Taka ĩ weder adouf, utornēg len, ĩ karĩ youf.

¹⁰ Taka ĩ kalabus bun ileya nigin igirnēf,

ĩ kalabus bun ilauf.

Taka ĩ dimig nem dukesiyouf nigin igirnēf,

dimig nem ĩ dukesiyouf.

Enei wō youf sain bun, Negur nē tamo kayau feseya sã totol difar fen, momoia kafĩ difel dirouwauf.

Gaar Kuĩ Teneb Bunem Ulō Yesen

¹¹ Anĩ bure fele di, gaar kuĩ taka teneburem ulō yeis mog, ailen. ĩ sipsip naal gen karat uru ado, anĩ ere, ĩ gogour odug gen wogō yedig. ¹² ĩ gaar kuĩ uyulil ulō yesin anĩ lof mog, yogon megeir ganan yale fen, kabĩ yalen. Agef fen, ĩ, teneub ado idi tenebur difaref anidi ganan, gaar kuĩ uyulil ulō yesin, are dũ di, laa fou fenē gen yenen anĩ baban biya len, ĩ yana dalesauf nigin nugo fedin. ¹³ Agef fen, ĩ uris memelik odug inodin, ĩ tamo kayau lo de mog, age fe di, yã saa ilunem tenebur isin anĩg age fen. ¹⁴ ĩ gaar

kuī uyulil ulō yesin anī lof mog, megeir yale fen, memelik inodin nigin, ī tenebur difaref anidi idegnēdin. Ī, gaar kuī, are dimig nem dū di, baban biya len anī yana dalesauf nigin, idi anī nē malakanon dinouf nigin irokenēdin. ¹⁵ Ī gaar kuī uyulil ulō yesin anī malakanon mata ifenēya nē megeir ifenen, anī bunem, malakanon are sã wogō yen, ī age fe di, idi malakanon anī yana yaleseyā ditoron anidi ganān didenkesin. ¹⁶ Gaar kuī dumen ulō yesin are, tamo kayau ganān, nanaal ado odudug, safina ado ado maleg, kafī fiya sã tamo ado ferfer, uris taka imeid biyalē be, demeid bun dalouf nigin nugo fedin. ¹⁷ Age fe di, aibem taka to na yale fen, to na sur foug, ī gaar kuī nē uris adouf anī dogol, uris are gaar kuī nē yana be, yogo yana nē namba.

¹⁸ Kisi biya adouf are, enei keleī youf. Are taka ī kariya biya adouf, ī utornēg len, gaar kuī nē namba iwesauf, ere nigin, namba are tamo nē. In namba are 666.

14

Sipsip Naal Ado 144,000 Tamo

¹ Anī bure fele di, aya lo afen, aya wageun Sipsip Naal Saion Arei bun 144,000, yogon yana ado yogon tama nē yana demeid bun itotoyan anidi, ī geid difaren. ² Age afe fen, aya ait taka saa ilunem, naan fatuk wī ye fen, gou redig gen ado, kolimei gudūya odug gen karī aun. Ait aya karī aun are, harp kodēya tamo harp kodē dedig gen. ³ Age de fen, idi, king nē sia, erēb mata ibodōya aiwa adodo ado, mudur adodo wagedin seg mata dalen. Aibem taka seg anī keleīya kisi feleya sã, 144,000 idi tenebur tamal kel gei fedin anidim dogol. ⁴ Eneidi are kayau geid yen ken, amuyē inoya sã anidi, ere nigin, idi dogo nigin karētut bagai dibodon. Idi Sipsip Naal narib ile di, idi dō de diyōdig. Idi tamo ganān atun kel geif fen, faat uyulil

yūya gen, Negur ado Sipsip Naal bun sesewi fedin. ⁵ Idi sigoredin idegēya taka to wō yen, idi bouweid bun od taka sã.

Engel Towo

⁶ Anĩ bure fele di, aya engel taka ilun bagai fatutu ye mog, ailen. Ī idi tenebur dibodok anidi, are teneub ganan, ibor ganan, od fire fire ganan ado, tamo kayau ganan bun kurō fesiyof nigin, mata ibodkeleya nē biya od ado ailen. ⁷ Ī ait odugem iron, “Negur anini wiyēg fen, ĩ fula fiya medeīya wenēg, ere nigin, yogon es fiya nē sain mogo isin. Ī saa, teneub, maaĩ ado, naan warur inodin anĩ yana waleseg.”

⁸ Anĩ dō fiya engel takam dō fiye ken, iron, “Ī kubū yen! Babilon Odug kubū yen, ĩ teneub ganan yogon seseirã tobonunã nē wain totol ifeneĩd don.”

⁹ Anĩ dō fiya engel takam dō fiyeĩd fen, ait odugem iron, “Taka ĩ gaar kuĩ ado yogon malakanon yana yales fen, yogon uris dama bun be, ima bun yalouf, ¹⁰ ĩg Negur nē didi nē wain yãf, are mogo totol adok yogon didi nē kap bun fi felen. Ī engel fateul anidi ado Sipsip Naal meleid bun, salfa yã bobo reya bun darau yalouf. ¹¹ Age fe di, dogo neid darau nē yãkaau fã ye, gai gai agef ibodkalauf. Idi gaar kuĩ ado yogon malakanon yana dalesedig anidi be, aib taka yogon yana nē uris yalen ĩ, naa be bō, si inoya nē sain sã.” ¹² Enei wō youf sain bun, Negur nē tamo kayau, idi Negur nē ĩtãfiya dō de fen, Jesus nigin momoiya dirou kafĩ difelef anidi, feseya sã megeir difarauf bagai.

¹³ Anĩ bure fele di, aya saa ilunem ait taka eig ye mog, karĩ aun, “Utot: Idi sain enei bunem ilauf ganan, Odug bun gare douf are el fediyouf.”

Awa Uurem irok, “Momoi, idi dogo neid kabĩ bun si dinouf, ere nigin, idi ereb age difen are ado dilauf.”

Tenebur Saaf Kusu Fiya Sain

¹⁴ Aya lo afen, aya wageun lalo lalau taka ado, lalo bun ibodon are ‘tamo naal gen,’* ĩ yogon mudur bun gol teter kurū fen, yogon ima bun dimig gunō waila ado irouf anī ailen. ¹⁵ Age fe di, engel taka tempel bunem isi fen, ĩ lalo bun ibodon anī ait odugem iweig irokenen, “Ogon dimig gunō waila ado wale fen, kokour wo, ere nigin, kokour fiya nē sain mogo isin, tenebur saaf kusu fiya nē are mogo mayol.” ¹⁶ Age ye di, lalo bun ibodon ĩ, yogon dimig gunō waila ado tenebur waī fe di, tenebur saaf kokour fen.

¹⁷ Engel taka, saa ilun oun tempel bunem isin, ĩg dimig gunō waila ado iroun. ¹⁸ Age fe di, engel takag, yā lo fedig anī alta bunem isi fen, ait odugem ĩ dimig gunō waila ado iroun anī iweig irokenen, “Ogon dimig gunō waila ado wale fen, tenebur tamal wain nē biya kuru wo, ere nigin, wain biya are mayol.” ¹⁹ Engel ĩ yogon dimig gunō waila ado anī tenebur waī fen, wain biya kuru fen, agef fen, ĩ Negur nē didi nē wain asi fiya modoū odug bun iraran. ²⁰ Wain biya are, taun yerin wain asi fiya modoū bun asi difen, age dife di, naud wain asi fiya modoū bunem isin, are 300 kilomita meluk fen, wan ado hap mita ilun.

15

Engel Sewen Teneub Daū Fiya Nē Sesen Sewen Adodo

¹ Anī bure fele di, aya saa ilun uris odug taka fire bagai ailen. Are engel sewen, idikeleya nē teneub daū fiya nē sesen sewen adodo, are idi idikeleya nē, ere nigin, idi bunem Negur nē didi idikalauf. ² Age afe fen, aya ereb taka maaī galas nem dinon anī, yā ado bagu fiya gen ail fen, idi gaar kuī, yogon malakanon ado, yogon yana nē namba kusī bun wal difen anidi, maaī yerin difaren anī

* **14:14:** Daniel 7:13

ailen. Idi Negurem harp ifenēdin anī guri de fen, ³ Negur nē ferfer, Moses nē seg ado, Sipsip Naal nē seg dalen:

“Odug Negur saa ilun nē kusī tamo guri weid yu uroudig anī,

ō agodig anī odug fen, mala yū yaleya.

Teneub ganan nē King,

ogon naab are madur fen, momoi bagai.

⁴ O Odug, aim anī ō to kumī yo ken,

ō yanā bun fula fiya medeīya to inouf?

Ere nigin, ō dogol fateul.

Ogon tobonunā biya madur bagai are yaor won nigin,

teneub ganan disi fen,

ō wagen yanā dalesauf.”

⁵ Anī bure fele di, aya lo afe mog, saa ilun oun tempel, Negur nē Od Kurō Fesiya nē Salafat Fateul, are kā fen.

⁶ Tempel namenem, engel sewen idi teneub daū fiya nē sesen sewen adodo anī ulō desain. Idi kolos lalau amuyē sā, medeīya difoun ken, idi akoreid bun gol let gu difedin.

⁷ Age dife di, ereb mata ibodōya aiwa adodo takam, gol beī sewen Negur mata faimud ibodkeleya nē didi isokoseya anī, engel sewen ifenēdin. ⁸ Age fe di, tempel are, Negur nē fula fiya medeīya ado yogon megeir nē kaau isokose di, engel sewen neid teneub daū fiya nē sesen sewen anī fau bure feleya sā mog, taka nem tempel namen ileya kisi feleya sā.

16

Beī Sewen Negur Nē Didi Ado

¹ Anī bure fele di, aya ait odug taka tempel bunem engel sewen irokeneīd fen, eig ye mog, karī aun, “Uleg, beī sewen Negur nē didi adodo anidi teneub bun fi weleg.”

² Engel uyulil ile fen, yogon beī teneub bun fi fele di, guruma sane darau odug bagai anī, tamo kayau gaar kuī

nē uris ado fen, yogon malakanon yana dalesedig anidi bun, wowā yen.

³ Anī dō fiya engel taka, yogon beī maaī bun fi fele di, maaī anī laa tamo nē naud gen falei fen, age fe di, ereb ereb maaīwō mata dibodon ganan gare den.

⁴ Anī dō fiya engel taka, yogon beī, naan odudug ado naan warur anidi bun fi felen, age fe di, naud falei feledin.

⁵ Age fe di, aya engel naan lo fedig anī eig ye mog, karī aun:

“Ō gama ubodok, kulu ubodon, ō Fateul Bagai,
ō madur bagai,
ere nigin, ō mogo ago es won.

⁶ Idi ogon tamo kayau ado ogon profet didenkeis fen, dogo neid naud fi difelen,
anī nigin, ō idi naud yōya nigin wenēdin, are idi yōya kisin bagai wenēdin.”

⁷ Age ye di, aya alta eig ye mog, karī aun:

“Mmoi, Odug Negur saa ilun nē kusī tamo guri weid uyu uroudig anī,
ogon es fiya are, momoi fen madur bagai.”

⁸ Anī dō fiya engel taka, yogon beī gaa bun fi fele di, gaa tamo kayau yā nem ifalegnēdiyof nigin megeir ifenen. ⁹ Idi uruwa total bagai bunem ifalegnēdi di, idi, Negur teneub daū fiya nē sesen eneidi lo fedidig anī, yana kono difen, age de fen, idi waud falei ye fen, Negur yana yaleseya ditoron.

¹⁰ Anī dō fiya engel taka, yogon beī gaar kuī nē king nē sia bun fi fele di, yogon tano gugum kelen. Tamo idi darau nigin baleid mū de fen, ¹¹ dogo neid darau ado gurumeid nigin, saa ilun nē Negur kono difen. Anī ere, idi ereb sane age difen anī to ditor ken, waud to falei yen.

¹² Anī dō fiya engel taka, yogon beī Yufretis naan odug bun fi fele di, naan are, gaa iseyan tamal king disiyof nē

naab dodok fiya nigin, gere kelen. ¹³ Anĩ bure fele di, aya kaa sesen towo felĩ gen, idi gogour odug awa kurem, gaar kuĩ awa kurem ado, idegēya profet awa kurem ulō deis mog, ailen. ¹⁴ Idi kaa sesen nē uur anidim memelik nē uris dino fen, idi teneub ganan nē king ganan bun dile fen, Negur saa ilun nē kusĩ tamo guri feid uyu iroudig anĩ nē naa odug bun, idi kusĩ bun guru difouf nigin gou difediyouf.

¹⁵ Jesus irok, “Lo welegei, aya bē tamo gen asiyouf! Taka ĩ mulaĩ yenēya sa ken, yogon kolos sirin ado ibodok are, ĩ el fiyek, ere nigin, ĩ gemũ to ile di, yogon mama to dilouf.”

¹⁶ Age de fen, idi king, Hibu od nem Amagedon dedig nē an guru difouf nigin gou difedin.

¹⁷ Anĩ dō fiya engel taka, yogon beĩ ilun owōbē fi fele di, tempel namenem king nē sia bunem ait odug wō ye fen, iron, “Gama mogo bure felef!” ¹⁸ Age fe di, kolimei filiya, gurūya odug, kolimei gudūya ado, mimĩ odug wō yen. Tamo tenebur difar mog, mimĩ odug age fiya taka to wō yen, mimĩ are gai odug bagai. ¹⁹ Taun odug Babilon are faraf towo fen, agef fen, teneub ganan nē taun daũ feledin. Negur ĩ Babilon Odug nigin weder fokōf fen, kap yogon didi barikā nē wain isokosen anĩ ifenen. ²⁰ Nuyo ganan sa kele di, areig ilediya kisi feleya sã. ²¹ Saa ilunem uyē ais ado odug, teke tekelei 50 kilogram age fiya tamo bun kuku ren. Age fe di, idi uyē ais adom daũ fedin nigin de fen, Negur kono difen, ere nigin, daũ fiya are, gai sane bagai.

17

Kayau Gaar Kuĩ Teten Ibodon

¹ Engel sewen beĩ sewen adodo anĩ takam isi fen, aya irokanan, “Usi, aya kayau bouwa na sur fedig odug, ĩ naan musei teten ibodōdig anĩ nē kafĩ fiya afelnōf. ² Tenebur nē

king, ĩ geid seseirã tobonunã dino di, tamo kayau tenebur difaref anidi, yogon seseirã tobonunã nẽ wain bunem, idi meleid waĩ yen.”

³ Age ye fen, engel ĩ Awa Uur bunem aya gerere tuan yale irouleyan. An aya, kayau, gaar kuĩ giriya, bouwa bun kono fiya yeneid barikã, mudur sewen ado, karat ten anĩ teten ibod mog, ailen. ⁴ Kayau ĩ, kolos giriya tu releya medeĩya ado giriya bagai ifoun ken, gol, meein meli bagai ado, maaĩ tuwa meli bagai pel naki yen. ĩ gol kap, ninir safineid ado yogon seseirã tobonunã nẽ sisik isokosen anĩ imam iroun. ⁵ Waa nẽ yana are, yogon dama bun ditoton:

BABILON ODUG

KAYAU BOUWEID NA SUR FIYA ADO

TENEBUR NINIR IBODOK ANIDI NEID SINA.

⁶ Aya, kayau, Negur nẽ tamo kayau neid naudeid ado, idi Jesus nẽ od kurŏ difesin anidi, nedi naudeid yokon, mala waĩ ye mog, ailen.

Aya kayau anĩ ail fen, fatuk bagai terẽ aun. ⁷ Age afe di, engel aya irokanan, “Ō ere nigin terẽ wof? Aya, ō, kayau nẽ waa ado, gaar kuĩ kayau anĩ teten ibodōdig, ĩ mudur sewen ado fen, karat ten ado anĩ nẽ waa anĩ faded ayōf. ⁸ Gaar kuĩ ulen are, kulu ibodon, gama ibodōya sã, agef fen, ĩ ku isil idīya sã bunem ulō yeis fen, yogo daũ falauf bun ilauf. Tamo kayau tenebur dibodok anidi, saa teneub ado kare fen sain bunem isin, idi yeneid mata ibodōya nẽ buk bun to itoton, idi gaar kuĩ anĩ dile fen terẽ douf, ere nigin, gaar kuĩ ĩ kulu ibodon, gama ibodōya sã, agef fen, fau dum isiyouf.

⁹ “Enei keleĩya nigin, kisi biya adouf. Mudur sewen are, arei mudu sewen kayau teten ibodōdig anĩ. ¹⁰ Idig king sewen anidi. Faif idi kuku ralaisin, taka fau ibodok, taka fau isiya sã. Anĩ ere, ĩ isiyouf are, sain naal bagai ibodōf.

¹¹ Gaar kuĩ kulu ibodon, gama ibodõya sã, are ã namba eit king, ã sewen anidi nẽ taka, ã yogo daũ fiya bun ilauf.

¹² “Karat ten õ ulen are, ten king idi tano fau yaleya sã anidi, anĩ ere, idi gaar kuĩ geid, aua tekelei king nẽ megeir dalouf. ¹³ Idi kisi tekelei ado fen, dogo neid megeir ado totol, gaar kuĩ difenẽf. ¹⁴ Idi Sipsip Naal geid kusĩ douf, anĩ ere, Sipsip Naal idi kusĩ bun wal fediyouf, ere nigin, ã odug neid Odug ado king neid King. Idi ã iweignẽdin anĩ, igirnẽdin anĩ, feseya sã dõ difen anidi, ã geid difarauf.”

¹⁵ Age ye fen, engel aya irokanan, “Naan, kayau bouwa na sur fedig ã anĩ teten ibodon, õ ulen are, tamo kayau, guru fiya odug, teneub ganan ado, od fire fire ganan.

¹⁶ Karat ten õ ulen ado gaar kuĩ, idi kayau bouwa na sur fedig anĩ to orodiyouf. Idi ã daũ difiye ken, gemũ dinenẽf. Idi ã bouwa dokon, yã nem tõ difiyẽf. ¹⁷ Negur idi neid waud bun kisi anĩ ino di, idi Negur nẽ oroya dõ difouf nigin, idi kisi tekelei dino fen, dogo neid tano gaar kuĩ difenẽf, age difef dile mog, Negur nẽ od kisi falauf. ¹⁸ Kayau õ ulen are, taun odug, tenebur nẽ king neid mudur ibodok anĩ.”

18

Babilon Narĩ Fen

¹ Anĩ bure fele di, aya engel taka saa ilunem isi mog, ailen. ã megeir odug ado, age fe di, yogon fula fiya medeıya anim teneub lalan len. ² ã ait odugem, totol bagai iweig iron:

“Kubũ yen! Babilon Odug kubũ yen!

 ã, kaa sesen neid fõ,
kaa sesen ganan neid fõ ado,

 ninã amuyẽ ado ninir sane to ile oroya ganan neid fõ
 falei fen.

³ Teneub ganan,

yogon seseirã tobonunã nẽ wain total don.
 Tenebur nẽ king, ã geid seseirã tobonunã dinon,
 age fe di, tenebur nẽ bisnis tamo idi, yogon safina
 nigin oroya total ado bunem, safina musei dalen.”

⁴ Anĩ bure fele di, aya ait taka saa ilunem eig ye mog,
 karĩ aun:

“Neu tamo kayau, ã yogon mosor anĩ utin to walogouf
 nigin ado,

ã in mala solo sane taka to walogouf nigin,

ã ã utornẽg fen, usig,

⁵ ere nigin, yogon mosor mogo mudu ilun isel saa ilune di,
 Negur yogon idododin nigin weder fokõ yen.

⁶ ã ifenein kilei abag wenẽgouf,

ereb ã age fen are, ã age fen anĩ ado, taka teten unog
 fen, wenẽgouf.

Ereb ã yogon kap bun falei fen are, ã falei fen anĩ ado,
 taka falei ge fen, teten unogouf.

⁷ ã fula fiya medeïya ado safina meli meli, yogo nigin yalen
 kilei,

darau ado wau gudũ fiya fatuk bagai wenẽgouf.

ã yogon wau bun, yogo yana yales fen,

‘Aya kuin abodok, aya waab sã,

agef fen, aya to bagai wau gudũ fouf,’ yen.

⁸ Anĩ nigin, naa taka bun, in daũ fiyẽya nẽ sesen ã bun
 isiyouf,

are laa, wau gudũ fiya ado, kadir.

Agef fen, ã yã bun isaikalauf,

ere nigin, Odug Negur ã es fiyek, ã anĩ megeir barikã.

⁹ “Tenebur nẽ king idi, ã geid seseirã tobonunã dino fen,
 yogon safina meli meli foi difen anidi, ã isaĩ di, kaau dile
 fen, idi ã nigin waud gudũf fen, inã logurouf. ¹⁰ Idi in darau
 yaleya anĩ nigin fatuk bagai kumĩ de fen, gerõ difar fen,
 dirõf:

“ ‘Malalon! Malalon, O taun odug,
O Babilon, taun megeir ado!

Aua tekelei bun, ogon daũ fiya mogo isin!’

¹¹ “Tenebur nē bisnis tamo idi ĩ nigin waud gudũf fen, inã logurouf, ere nigin, taka nem idi neid safina baban to na yalouf, ¹² safina are, gol, silwa, meein meli meli ado, maaĩ tuwa meli bagai pel; gabar lalau medeĩya, gabar giriya tu releya medeĩya, gabar slika ado, gabar giriya bagai; aa meli meli fire fire; ereb ereb fire fire elefan karat nem, aa meli meli nem, bras nem, ain nem ado, mambol nem dinodin; ¹³ sinamon, ye, aa gaula sumeĩ nigin tō fiyadig, moul aa bun tamal sumeĩ biya biya ado, moul biya takag; wain ado oliv moul; flawa ado wit, bulmakau ado sipsip; hos ado karis, ferfer ado tamo mata dibodok.

¹⁴ “Idi dirõf, ‘Ereb ereb yaleya nigin õ oroyon are, mogo sa kelen. Ogon safina musei ado ereb ereb fula fiya medeĩya ganan, mogo sa kelen, idi baban to bagai fotou difouf. ¹⁵ Bisnis tamo safina eneidi na sur dife fen, ĩ bunem safina musei dalen anidi, yogon darau nigin fatuk bagai kumĩ de fen, gerõ difarau. Idi inã logur fen, waud gudũf fen, ¹⁶ diweig dirõf:

“ ‘Malalon! Malalon, O taun odug,
kolos lalau meli bagai, giriya tu releya medeĩya ado,
giriya bagai ifoun ken,
gol, meein meli bagai ado, maaĩ tuwa meli bagai pel
naki yen!

¹⁷ Aua tekelei bun dogol, safina odug bagai age fiya daũ felen!’

“Maaĩ bun ulum irouya tamo ganan, idi waag bun diyõdig ganan ado, idi maaĩ bunem dogo neid mata ibodõya nē safina daledig anidi ganan, gerõ bagai difarau. ¹⁸ Sain idi ĩ isaĩ di, kaau dile fen, idi diweig dirõf,

‘Taun odug eig fiya taka tau ibodon?’ ¹⁹ Idi aas mudureid bun digu ken, waud gudū fe di, inā logur fen, diweig dirōf:

“Malalon! Malalon, O taun odug,
an idi maaĩ bun waag adon ganan,
yogon safina odug bunem safina musei dalen!

Aua tekelei bun, are daũ felen!

²⁰ O saa ilun, ĩ nigin waũ kulĩ ye!

Negur nē tamo kayau, aposel ado, profet, wauĩ kulĩg!
Ī ã age yein kilei, Negur ĩ es fiyen.’ ”

²¹ Age ye fen, engel megeir ado, meein odug wit itutuya nē age fiya, yale fen, maaĩwō ira ken, iron:

“Waila sane eig fiya bunem,
Babilon taun odug agef daũ fe di,
baban to bagai dilouf.

²² Harp kodēya tamo, seg tamo, kelel fiya tamo ado, taur fūya tamo,
idi neid ailō ò bun baban to bagai karĩ douf.

Kabĩ fire fire ganan nē keleĩ tamo,
ò bun baban taka to bagai wō youf.

Wit itutuya nē meein ait,
ò bun baban to bagai karĩ douf.

²³ Lam nē lalan ò bun baban to bagai so fouf.

Tamo kayau yalef yalef yeya ait,
ò bun baban to bagai wō youf.

Ogon bisnis tamo idi, teneub ganan nē tamo odug.

Ō ogon idegēya kosē bunem, teneub ganan udegnēdin.

²⁴ Profet, Negur nē tamo kayau ado,
tenebur ein didenkesin anidi ganan neid naudeid, ĩ bun dilen.”

19

Halleluya!

¹ Anĩ bure fele di, aya saa ilun tamo kayau guru fiya mala odug neid aiteid gou reya gen, karĩ aun:

“Halleluya!

Kel gei fiya, fula fiya medeĩya ado, megeir are, neda Negur nē.

² Yogon es fiya are, momoi fen madur bagai.

Ĩ kayau bouwa na sur fedig odug,

ĩ yogon seseirã tobonunã bunem teneub daũ fen anĩ,
es fiyen.

Ĩ yogon ferfer neid naudeid, anĩ mala solo ĩ bun ifenen.”

³ Idi baban diweig diron:

“Halleluya!

Ĩ bunem kaaufaimud gai gai iselauf.”

⁴ Mudur adodo tuwenti-fo ado, ereb mata ibodōya aiwa adodo, kuku de fen, Negur king nē sia bun ibodon anĩ yana dalesen. Age de fen, idi diweig diron:

“Momoi, Halleluya!”

⁵ Age dife di, ait taka, king nē sia bunem wō ye fen, iron:

“Ā in ferfer ganan,

ĩ anini wiyēgedig,

nanaal ado odudug,

neda Negur yana waleseg!”

⁶ Age ye di, aya guru fiya mala odug aiteid gen karĩ aun, are naan fatuk wĩ ye fen, gou redig gen ado, kolimei gudūya odug gen, diweig dirō mog, karĩ aun:

“Halleluya!

Ere nigin, neda Odug Negur saa ilun nē kusĩ tamo guri feid uyu iroudig anĩ, ĩ lo fiya nigin king ibodok.

⁷ Ada wauda kulĩ ye, wauda al fe fen,

fula fiya medeĩya tafenēf!

Ere nigin, Sipsip Naal kayau yaleya nē naa mogo isin,

age fe di, yogon kayau mois mogo yogo nigin dodok fen.

⁸ Kolos lalau meli bagai, medeīya ado filiya, ĩ ifonūf nigin ifenen.”

(Kolos lalau meli bagai are, Negur nē tamo kayau neid tobonuneid madur anī.)

⁹ Anī bure fele di, engel aya irokanan, “Utot: ‘Idi Sipsip Naal kayau mois ado bagu fiya nē sifa bun ibodōya nigin iweignēdin are, idi el fedif!’ ” Age ye fen, ĩ tobol fe iron, “Enei are, Negur nē od momoi bagai.”

¹⁰ Age fe di, aya ĩ yana alesauf nigin, ye gariyan kubū aun. Anī ere, ĩ aya irokanan, “To ago! Aya, ō ado, ogon turā tar idi Jesus nē wogōya kafī difel dirouf anidi geid, ada in ferfer. Negur yana wales! Ere nigin, Jesus nigin wogōya are, profet od wogōya nē uur anī.”

Tamo Hos Lalau Teten Ibodon

¹¹ Aya saa ilun kā feleya ifar mog, aya wageun an hos lalau ifar mog, ailen. Tamo anī teten ibodon are, yana ‘Feseya Sā Dō Fiya Biya’ ado ‘Momoi Bagai’ dedig. Madur bagai bunem, ĩ es feid fen, kusī yedig. ¹² Yogon mala are, yā mala fitotoleya gen, agef fen, yogon mudur bun teter musei biya. ĩ yogo bun yana itotoya taka ado, are aibem taka to keleī, ĩ yogo dogol. ¹³ ĩ kolos meluk naud bun nu fen anī ifonun. Yogon yana are, Negur nē Od. ¹⁴ Saa ilun nē kusī tamo, idi hos lalau tetedin dibodada ken, kolos meli bagai, lalau filiya difoun ken, ĩ dō difiyen. ¹⁵ ĩ yogon awa bunem, dimig waila ado, teneub ganan yūf nigin wō yen. “ĩ ain manig nem ulum iroukenēdiyof.”* ĩ, Negur saa ilun nē kusī tamo guri feid uyu iroudig anī nē didi total nē wain asi fiya modoū bun, asi fouf. ¹⁶ ĩ, yogon

* **19:15:** Sam 2:9

kolos meluk bun ado yogon tukuri bun, yana enei itotoya ibodok:

KING NEID KING ADO ODUG NEID ODUG.

¹⁷ Age afe fen, aya engel taka gaa bun ifar mog, ailen, ĩ ait odugem ninã ganan ilun fatutu def anidi iweig irokenēdin, “Usig, Negur nē sifa odug bun gurug, ¹⁸ agog fen, ā, king bouweid, kusī mudur bouweid, tamo megeir adodo neid bouweid, hos ado hos tetedin dibodadak anidi neid bouweid, tamo kayau ganan, kafī fiya sã tamo ado ferfer, nanaal ado odudug, bouweid wãgauf.”

¹⁹ Anĩ bure fele di, aya, gaar kuĩ, tenebur nē king ado, dogo neid kusī tamo idi, tamo hos teten ibodon anĩ, yogon kusī tamo geid weim kusī douf nigin, guru de mog, ailedin.

²⁰ Anĩ ere, gaar kuĩ are dale diroun, age de fen, idegēya profet, ĩ memelik nē uris gaar kuĩ mala bun inodin anĩg, gaar kuĩ ado dale diroun. Uris anidi bunem, ĩ, idi gaar kuĩ nē uris dalen anidi ado, idi yogon malakanon yana dalesedig anidi idegnēdin. Idi urom mata dibod mog, ku kolili fiya meein salfa yã bobo reya barikã ado bun, gei de diraran. ²¹ Dogo neid kusī tamo ganan, dimig, tamo hos teten ibodon awa bunem wõ yen anim, idenkesin, age fe di, ninã ganan idi neid bouweid dõ dõ, teid isokosen.

20

Tausen Yar

¹ Anĩ bure fele di, aya engel taka saa ilunem, ĩ ku isil idīya sã nē ki ado, sen odug imam irou fen, isi mog, ailen.

² Ĩ gogour odug, gogour kulu tamal bagai, are Devil be Satan dedig anĩ yale fen, tausen yar ifarauf nigin sen nem ifokelen. ³ Ĩ ku isil idīya sã bun ira ken, ku katī fel fen, anĩ teten itāfiya uris inon. Ĩ tenebur tamo kayau to idegneid mog, tausen yar ilauf nigin age fen. Anĩ bure fele di, sain tobega dogol ĩ folõ fiyekalauf.

⁴ Aya, king nē sia anidi bun, idi es fiya nē megeir ifenēdin anidi dibod mog, ailedin. Age afe fen, aya, dogo neid biya od Jesus nigin wogō den ado, Negur nē od nigin, uleid kokour difedin anidi neid meleidkanon ailen. Idi gaar kuī be, yogon malakanon yana to dales fen, yogon uris demeid bun be, imeid bun to dalen. Idi mata ke de, fã de fen, Kristus geid, lo fiya nigin tausen yar ilauf anī nē mudur dibodon. ⁵ (Tamo gare den tunī ganan to ke de, fã de mog, tausen yar are bure felen.) Enei are, kel fãya uyulil anī. ⁶ Idi kel fãya uyulil anī bun ke de, fã den are, idi el feid fen, fateul. Laa uyulil anī dō fiya isif are, idi bun megeir sã. Anī ere, idi Negur nē ado Kristus nē pris dibod ken, tausen yar anī bun, Kristus geid, lo fiya nigin mudur dibodōf.

Satan Daū Felen

⁷ Tausen yar anī bure fele di, Satan ī yogon kalabus bun tamal yalelnē di, ⁸ ī tamo kayau teneub ganan bun idegnēdiyof nigin, teneub idīyan aiwa adodo, are Gog ado Magog bun ile fen, idi kusī bun ileyā nigin gou fediyof. Idi neid namba are, maaī ubun mumul ifaref age fiya. ⁹ Idi teneub modoū odug bun dile fen, Negur nē tamo kayau neid modoū ado, taun Negur anī nigin wau laa fedig anī salili difen. Anī ere, yã saa ilunem isi fen, idi yakur feidlen. ¹⁰ Age fe di, Satan idi idegnēdin are, ku kolili fiya meein salfa yã bobo reya ado bun dale diran, gaar kuī ado idegēya profet idi ketem mogo an diraran. Idi ganan an sain ganan, bō ado gaa ado, gai gai darau dalouf.

Gare Den Anidi Es Fediyof

¹¹ Anī bure fele di, aya king nē sia lalau odug ado, taka anī teten ibodon anī ailen. Teneub ado saa, ī mala iran nē waif yale di, idi modoū san. ¹² Age fe di, aya, gare den anidi, odudug ado nanaal, sia wagen difaren ado, buk ikoudiya anidig ailedin. Buk takag ikouya ailen are, mata

ibodōya nē buk. Gare den anidi, ereb age difen buk bun itoton anī kilei, es fedin. ¹³ Maañ bun gare den anidi, maaim ifenēdi di, laa ado Hades, gare de di, idi bun difaren anidi difenēdin. Age fe di, mugu mugu ereb age difen kilei, es fedin. ¹⁴ Age fe di, laa ado Hades, ku kolili fiya yā bobo reya ado bun geif iraran. Ku kolili fiya yā bobo reya ado, are laa uyulil isin anī dō fiya laa anī. ¹⁵ Aib taka ī, yogon yana mata ibodōya nē buk bun itotoya sā ilen, ī ku kolili fiya yā bobo reya ado bun, yale iran.

21

Jerusalem Mata

¹ Anī bure fele di, aya, saa mata ado teneub mata, ailen. Saa uyulil ado teneub uyulil are waif yalen, agef fen, mañ baban to ibodon. ² Aya Taun Fateul, are Jerusalem mata, Negur bun tamal, saa ilunem isi mog, ailen, are kayau mois tamon ileya nigin naki rel fen, dodok fen gen. ³ Age afe fen, aya ait odug king nē sia bunem eig ye mog, karī aun, “Gama Negur nē salafat, tamo bun ibodok, age fe di, ī idi geid dibodōf. Idi yogon tamo kayau ouf, age fe di, Negur yogo bagai, idi geid dibod ken, idi neid Negur ibodōf. ⁴ Ī idi neid meleid bun maruid ganan waī falauf. Baban laa, wau gudū fiya, inā yaleya be, darau to ibodōf, ere nigin, ereb ereb tubu nē are, ganan sa kelen.”

⁵ Ī king nē sia bun ibodon are iron, “Aya ereb ereb ganan mata anof!” Age ye fen, ī iron, “Enei utot, ere nigin, od eneidi are, agef bagai wō youf nigin momoi bagai.”

⁶ Ī aya irokanan, “Gama mogo bure felen. Aya uyulil ado idikeleya, gariya ado idikeleya. Taka ī naan ail foug, aya ī mata ifenēya nē naan warur bun tamal, mala sā, afenē di, yāf. ⁷ Taka ī kusī wal foug, ī enei ganan akorouf, age fe di, aya yogon Negure di, ī neu kesu ibodōf. ⁸ Anī ere,

idi dume dume age difedig, momoiya sã, tobonunã sane bagai dinodig, tamo dukesidig, noli tobonunã dinodig, idegēya bun kosē dedig, idegēya waitou yana dalesedig ado, idegēya tamo ganan, idi neid modoũ are, ku kolili fiya meein salfa yã bobo reya barikã ado bun. Enei are, laa uyulil dō fiya namba tu laa anĩ.”

⁹ Engel sewen anĩ taka, beĩ sewen idikeleya nē sesen barikã teneub daũ fiya nē ado anĩ taka, isi fen, aya irokanan, “Usi, aya kayau mois, Sipsip Naal nē kayau anĩ afelnōf.” ¹⁰ Age ye fen, ĩ aya Awa Uur bunem arei odug ilun bagai anĩ bun irouleya fen, Taun Fateul, Jerusalem, Negur bun tamal saa ilunem isi mog, ifelnan. ¹¹ Taun are, Negur nē fula fiya medeīya anim so fen. Yogon medeīya are, meein na sur fiya nē meli bagai jasper gen, yagon filiya are, galas medeīya bagai gen. ¹² Taun are, yagon garaĩ odug ilun fen, bobog tuwelf ado. Agef fen, engel tuwelf bobog bun difaren. Bobog bun, Israel ibor tuwelf anidi yeneid itoton. ¹³ Bobog towo gaa iseyan, bobog towo not melē, bobog towo saut melē, bobog towo gaa ileyen age de difaren. ¹⁴ Taun anĩ nē garaĩ, gariya tuwelf ado, gariya tuwelf anĩ bun, Sipsip Naal nē aposel tuwelf yeneid ado.

¹⁵ Engel aya wogō fiyan are, ĩ taun, taun nē bobog ado, yagon garaĩ sisi fediyouf nigin, sisi fiya nē gol tibog iron. ¹⁶ Taun nē bagalam ado bogorou kilei kilei inon. Engel are tibog nem taun sisi fe fen, ilen, 2,200 kilomita meluk, yagon bagalam ado yagon ilun areg de anĩ kilei. ¹⁷ Engel ĩ, tamo nē sisi fiya bunem, taun garaĩ nē mugi sisi fen, are 65 mita, areg engel nē sisi fiya. ¹⁸ Garaĩ are, meein jasper nem inon. Agef fen, taun are gol bagai nem dogol inon, gol filiya are galas medeīya bagai gen. ¹⁹ Taun garaĩ nē gariya are, meein meli bagai fire fire nem, naki fen. Gariya uyulil ifaren are jasper nem, anĩ dō fiya are meein maaĩ gegē gen sapaia nem, anĩ dō fiya are meein kalsedoni nem, anĩ dō

fiya are meein aarau mata gen emeral nem, ²⁰ anī dō fiya are meein giriya ado lalau sadonikis nem, anī dō fiya are meein giriya konilian nem, anī dō fiya are meein aarau mayo gen krisolait nem, anī dō fiya are meein aarau mata gen beril nem, anī dō fiya are meein aarau mayo gen topas nem, anī dō fiya are meein krispres nem, anī dō fiya are meein haiasin nem, anī dō fiya are meein giriya ametis nem. ²¹ Bobog tuwelf are maaī tuwa meli bagai pel tuwelf, bobog teke tekelei, maaī tuwa meli bagai pel teke tekelei nem inon. Taun nē naab odug are, galas karētut bagai gen, gol bagai nem dogol inon.

²² Aya taun an tempel taka to ailen, ere nigin, Odug Negur saa ilun nē kusī tamo guri feid uyu iroudig anī ado Sipsip Naal are, idi anī tempel. ²³ Taun are, gaa lalan be, ogō lalan yaleya nigin to yenek, ere nigin, Negur nē fula fiya medeīya anim lalan ifenēdig, agef fen, Sipsip Naal are taun nē lam. ²⁴ Tenebur tamo kayau, taun anī nē lalan bun diyō di, tenebur nē king, nedi fula fiya medeīya, taun anī bun dirousiyouf. ²⁵ Naa taka bun, yogon bobog taka to bagai inolalauf, ere nigin, an bō sāf. ²⁶ Tenebur tamo kayau idi, nedi fula fiya medeīya ado yana odug, taun anī bun dirou disiyouf. ²⁷ Ereb taka amuyē ado an namen to ilauf, agef fen, aib taka mama nē tobonunā age fedig be, idegēdig, īg an to ilauf, anī ere, idi yeneid Sipsip Naal nē mata ibodōya nē buk bun itoton anidi dogol dilauf.

22

Mata Ifenēya Nē Naan Odug

¹ Anī bure fele di, engel ī, aya, naan odug, mata ifenēya nē naan, are karētut galas medeīya bagai gen, Negur nē ado Sipsip Naal nē king nē sia bunem isif anī ifelnan, ² naan are taun nē naab odug atu isilen. Naan si sitakā, mata ifenēya nē aa difaren, are yar tekelei bun faat yū

tuwelf fedig, ogõ teke tekelei bun yogon faat yũdig. Agef fen, aa aarau are, tenebur tamo kayau dagi yalelkenẽdiya nẽ. ³ Isisiãa taka baban to ibodõf. Negur nẽ ado Sipsip Naal nẽ king nẽ sia are, taun namen ibodõf, age fe di, yogon ferfer idi, in aruna dalouf. ⁴ Idi in nawa dilouf, age dife di, yogon yana idi demeid bun ibodõf. ⁵ Baban bõ taka to ibodõf. Idi lam nẽ lalan be, gaa nẽ lalan nigin, to kisi difouf, ere nigin, Odug Negur idi lalan ifenẽdiyof. Age fe di, idi gai gai lo fiya nigin mudur dibodõf. ⁶ Engel ã aya irokanan, “Od eneidi are, agef bagai wõ youf nigin momoi bagai. Odug, profet neid uur nẽ Negur, ã ereb mogo wõ youf bagai anã yogon ferfer ifelnẽdiyof nigin, yogon engel sur fen.”

Jesus Mogo Isif

⁷ “Ulef! Aya mogo kaisã bagai asiyof fenẽ! Taka ã profet od buk enei bun ibodok anã dõ fef are, ã el fiyek.”

⁸ Aya, Jon, ayam eneidi karã au fen, ailedin. Sain aya anã karã au fen, ailedin, aya engel aya ifelnan anã, ye gariyan kubũ au fen, yana alesauf nigin age afen. ⁹ Anã ere, ã aya irokanan, “To ago! Aya, õ, ogon turã tar profet ado, idi buk enei nẽ od dõ difef anidi ganan geid, ada in ferfer. Negur yana wales!”

¹⁰ Age ye fen, ã aya irokanan, “Õ buk enei nẽ profet od anã bun, ãtãfiya uris to uno, ere nigin, sain mogo melsak.

¹¹ Aib ã mosor inof, utornẽg len, ã agef mosorei youf. Aib ã sane age fef, utornẽg len, ã sane agei fouf. Aib ã biya age fef, utornẽg len, ã biya agei fouf. Aib ã fateul ibodok, utornẽg len, ã fateulei youf.”

¹² Jesus irok, “Ulef! Aya mogo kaisã bagai asiyof fenẽ! Mala solo tamo ifenẽdiya nẽ are yeir, aya bun ibodok, anã nigin, aya, tamo mugu mugu ereb age difen kilei anã

afenēdiyof. ¹³ Aya uyulil ado idikeleya, uyulil nē ado dumen bagai nē, gariya ado idikeleya.

¹⁴ “Idi dogo neid kolos meluk kulo difef, anī bunem, idi mata ifenēya nē aa bun ileya nigin ado, taun nē bobog bunem taun namen ileya nigin kisi feleya, are idi el fedif.

¹⁵ Mayarē difaref are, idi gaū, idi idegēya bunem kosē dedig, noli tobonunā dinodig, tamo dukesidig, idegēya waitou yana dalesedig ado, idi ganan idegēya nigin waud laaf fen, age difedig anidi.

¹⁶ “Aya, Jesus, ayam kurō fesiya od enei sios nigin afeneif nigin, ā bun neu engel sur afen. Aya Dawid nē Warumutei ado Ibor, Bonimei nē Barisa medeīya.”

¹⁷ Awa Ur ado kayau mois dirok, “Usi!” Aib taka ī karī yef, irōf, “Usi!” Aib taka ī naan ail fef, utornēg len, ī isiyof. Aib taka ī orof, utornēg len, ī mata ifenēya nē naan ege luwa yalouf.

¹⁸ Aya, idi ganan buk enei nē profet od karī def anī, totol bagai arokenēdif: Aibem taka od enei teten ereb taka tobol fouf, Negur ī daū fiya nē sesen buk enei bun itoton anī, ī bun tobol fouf. ¹⁹ Agef fen, aib taka profet od nē buk enei bun od taka yalelauf, Negur ī, mata ifenēya nē aa ado taun fateul, buk enei bun faded fel itoton anidi bun tamal, ī yalelnēf.

²⁰ Taka ī enei ganan kurō fesif, are irok, “Momoi, aya mogo kaisā bagai asiyof fenē.”

Momoi. Odug Jesus usi.

²¹ Odug Jesus nē wau ifenēya, Negur nē tamo kayau bun ibodōf. Momoi.

Mata Ifenēya Nē Od
The New Testament in the Marik Language of Papua New Guinea
Nupela Testamen long tokples Marik

copyright © 2011 Wycliffe Bible Translators, Inc.

Language: Marik

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 0868934534

The New Testament

in Marik

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-07-22

PDF generated using Haiola and XeLaTeX on 19 Oct 2021 from source files dated 20 May 2021

d7099f9d-3bdf-5620-8eb3-7e6c51cab7ea